

REGIONAL NEWS

HEADLINES:-

1. Larsap General (Rtd) Vijay Kumar Singh-an Catholic Kohhranin Mizoram khawtlang nun, rinna leh ngaihtuahna siam dik kawngah a thawh hlawk hle tih a sawi.
2. LESDE Director Pu John Tanpuia'n Labour Code dan thar hnuaiiah kuthnathawktu tan hamthatna hrang hrang a awm thu a sawi.
3. ICFAI University Assistant Professor Dr. Lalengkima'n India hnam hla Vande Mataram chu ram mipuiten India mi nihna thinlung an put thar lehna tura hla pawimawh a ni a ti.
4. Prime Minister Narendra Modi-a'n buh thar chhuah lamah India-in mel lung pawimawh tak a thleng tih sawiin buh, ton maktaduai 357 thar chhuah a ni, a ti.

<><><>

CATHOLIC CENTENARY

Larsap General (Rtd) Vijay Kumar Singh chuan Catholic Kohhranin Mizoram khawtlang nun, rinna leh ngaihtuahna siam dik kawngah a thawh hlawk hle tih a sawi.

Mizoram Catholic Kohhran-in kum 100 tlin lawmna puala kumtluana programme hrang hrang an kalpui kharna inkhawm, Bishop's House Compound, Ramthar Veng, Aizawla neih a hmanpui na ah he thu hi sawiin Larsap chuan Mizoram Catholic Kohhranin kum 100 hmel a hmu ta chu a lawmawm takzet ani ati a, kum 100 chuang kaltaa chanchintha kenga Mizorama lokal Missionary te'n Pathian thu mai ni lo, zirna, hriselna leh khawtlang nun chawikanna an rawn kentel thu sawiin, a rahchhuah chu hmuh theihin a awm mek a ti a, inpumkhatna, ralmuanna leh inngaihsaktawna chu mite'n Mizoram an ngaihsanna chhhan a ni, a ti.

Larsap chuan Catholic Kohhranin vantlang rawngbawlna, hriselna, zirna leh Kohhran dang nena inremna leh thalaite tihhmasawn kawnga an hmalaknate fakawm a tih thu a sawi a. Mizoram Catholic Kohhran member-te chu kum 100 dang lo la awm tur thlir chung a inpekna nena rawngbawlna chhonzawm tura chahin, thalaite nun kawng dika hruai tura kaihhruaina tha pe turte, tunlai thiamna hmang tangkai deuh deuh turte, muanna leh inpumkhatna chawilar zel tur leh mirethei leh hnuaihningte rawngbawl sak kawnga inpekna thar nei turtein a chah bawk.

Chief Minister Pu Lalduhoma pawhin thusawiin mirethei leh chanhaite chhawmdawlina kawnga Catholic Kohhran hmalakna chu a fakawm hle ani ati a, Mizoramah Zoram Entu Pawl (ZEP) kaltlanga hna ropui tak an thawh thin thu a sawi a. Catholic Kohhran member Mizo hnam tana mi hlu takte chanchin tarlangin, ram hruaitu leh mi hmingtha tam tak an chherchhuah thu a sawi a. Mizoram tana hna ropui tak tak an thawh avangin an chungah state mipui aiawhin lawmthu a sawi a ni.

Mizoram Catholic Kohhran hi February 1, 1925 khan din a ni a. Tun dinmunah hian member 20,000 chuang an awm a ni.

<><><>

EFCI

Evangelical Free Church of India (EFCI) Mizoram Regional Headquarters huaihawtin Zirtawpni atang khan Vairengte Chhimveng Biak In (Kolasib Presbytery) ah Regional Joint Conference vawikhatna hman ani a, zanin hian a tiak ang.

Inkhawmpui thupui atan "Inpumkhatna" (Johana 17:11) tih hman ani a, hemi hun chung hian Regional Committee (Puipa), Regional Kristian Hmeichhe Pawl leh Regional Kristian Thalai Pawl te'n rorelin hruaitu thar an thlang a. Regional Inkhawmpui hi kumkhat danah neih chhunzawm zel nise ati ani.

Tunah hian EFCI Mizoram Region huamchungah Presbytery panga - Aizawl, Khawlian, Kolasib, Lunglei leh Sakawrdai awm mekin, Tualchung Kohhran 48, Kohhran Member 13,451, Pastor 22 leh Kohhran Upa 195 an awm mêk a ni.

<><><>

CHRISTMAS PREPERATION

Khawvel hmunn dangte ang bawkin, Mizoramah pawh Krismas hman turin mipui an inpuahchah mek a, Aizawl khawpui chungah veng hrang hrang te chuan an veng kawm leh hmun rem laite an cheimawi mek a ni.

Nizan khan kan palaiin Aizawl khawpui veng hrang hrang a tlawh kual a, Bawngkawn, Chanmari, Zarkawt, Tuikhuahtlang leh Sikulpuikawn te chu chei mek a ni a, cheimawi hna hi zawh la ni chiah lo mah se tlawhtu an tam nghal hle a, mipuiin an ngaihlu hleani.

Akashvani News Aizawl zawhna chhangin, kawm chei tlawhtu zinga pakhat chuan Krismas puala kawm chei awm thin chuan an nun a tih hlim thu leh, naupang, thalai leh nu leh pa thlengin an hlimpui tih a sawi a, thlasik boruak vawt leh khawlai chei chu inhme hle a, a hriat thu leh, krismas ti krismas tu zinga pakhat ni theia a hriat thu a sawi baw.

Kawm chei te hi December thla tirah endik a ni ang a, endik laia a dinhmun a zirin a titha thlan chhuah a ni anga, hei vang hian kawmchei turte chu November chungah chei zo hman tawh tura beisei an ni. Lawmman hi a cheitu - Local Council emaw Pawl hming emawa pek a ni ang. LC pakhat huam chungah hmun khat aia tam chei a nih chuan hmun khat anga ngaih a ni anga, lawmman pakhat hlan a ni ang.

Lawmman hi pakhatna - Rs. Nuai 2 leh Citation; pahnihna - Rs. Nuai 1 sing 5 leh Citation; pathumna - Rs. Nuai 1 leh Citation bakah veng pasarih tan Consolation prize - Rs. 50,000 leh Citation pek an ni ang.

<><><>

LABOUR CODE

Labour, Employment, Skill Development (LESDE) and Entrepreneurship Department Director Pu John Tanpuia chuan kuthnathawktute dan thar Labour Code hnuaia hnathawka mi chhawr tuten hriselna lam kaihhnawih health insurance eng emaw chen an tumsak tur a nih bakah hnathawktute dinhmun chawikanna tur a awm nual thu a sawi.

Akashvani News palaiin a kawmnaah he thu hi sawiin Pu John Tanpuia chuan mi tupawh mimal dawr emaw thil siamchhuahna hmun nei emaw chuan an hnathawkte appointment letter felfai tak an pek ve a ngaih tawh dawn thu a sawi a. Kum khata ni 180 thawk chin te chu hlawh kiam chuang lova chawlh (paid leave) an neih theihna tur te, hmeichhia leh mipa hlawh inang te, zan lama hmeichhia te hna an thawh theihna tur te leh hriselna kawnga a chhawrtute mawhpurhna hrang hrang Labour Code tharah a tel ani ati.

Pu John Tanpuia chuan ram pum huapin hnathawktuten dan thar chu an thatpui a rin thu sawiin India ramin kum 2047-a ram intodelh leh ei leh bara hmasawn ber te zinga tel a tum mekah pawh he dan thar hi thil pawimawh ber te zinga mi a nih dawn thu a sawi a. Mizoramah pawh hmahlir nei rana he danin a huam theih tur hnathawktu an lo pun belh zel theih nan sorkar hna chauh ni lo, industry tam zawk neih kawngah pawh ngaihtuahna sen tul a tih thu a sawi a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

VANDE MATARAM

ICFAI University Assistant Professor Dr. Lalengkima'n India hnam hla Vande Mataram chu ram mipuiten India mi nihna thinlung an put thar lehna tura hla pawimawh a ni a ti.

Akashvani News Aizawl palaiin a kawmnaah he thu hi sawiin Dr Lalengkima chuan kumin October thla khan Union Cabinet thukhawm chuan Vande mataram kum 150-na lawm ni se tia an rel thu leh hemi pual hian kawng hrang hrangin programme buatsaih a nih thu a sawi a. Vande mataram chu India sorkarin kum 1950 khan National Song atan a thlang tawh tih sawiin a phuahtu chu Bankim Chandra Chatterjee a nih thu leh a hunlai chuan India ramin British awpna hnuai atanga a chhuahna theihna tura mipuite fuihtu leh mipuite rilru kaihruaitu pawimawh tak a nih thu a sawi.

Dr. Lalengkima chuan tunhnaiah sorkar laipuiin a tharthawh leh chu India mipuitea hnam rilru tuh thar lehna atana hmalakna pawimawh tak a ni a ti a. Hei hi mipuite tan pawha thil tha tak, tha taka roreltu sorkar thawhpui theihna tur leh ram hmasawanna hna tha taka a kal zel theihna tura mipuite rilru kaihruaitu tha tak a ni a ti bawk.

<><><>

MANN KI BAAT

Prime Minister Narendra Modi-a'n buh thar chhuah lamah India-in mel lung pawimawh tak a thleng tih sawiin buh, ton maktaduai 357 thar chhuah a ni, a ti a, kum 10 kalta aiin buh thar chhuah hi ton maktaduai 100-in a tam zawk a ni, a ti.

He thu hi vawiin Akashvani-a Mann Ki Baat hun a hmanna-ah sawiin Pu Modi-a chuan infiamna khawvelah pawh India-in hun ropui tak a chang chhova, tunhnai lawk khan Commonwealth Games thleng turin puan a ni, a ti. November thla hi sports lama India-in hlawhtlinna chi hrang hrang a chan thla anih thu tarlangin thla bul lamah ICC Women's World Cup-ah India hmeichhe team an champion a, tunhnaia Tokyo-a Deaf Olympics neiah India-in medal 20 la-in hetiang Olympics-a an chet that ber tum a tling a ni, a ti a, Kabbadi World Cup-ah India hmeichhia-te chak berin World Boxing Cup Final-ah India aiawh-ten medal 20 an lak thu leh Blind Cricket World Cup India hmeichhe team chu hneh loh nei lovin an champion bawk a ni, a ti.

<><><>

ALL PARTY MEETING

Parliament thlasik thutkhawm neih tur chungchangah sorkar huaihawtin vawiin khan Parliament House Annexe-ah political party hrang hrang thutkhawm neih a ni a, thutkhawm hi Union Defence Minister, Rajnath Singh-a'n a kaihruai a ni.

Thutkhawmah hian Rajya Sabha House Leader, JP Nadda, Parliamentary Affairs Minister, Kiren Rijju, Parliamentary Affairs Minister of State 2 - Arjun Ram Meghwal-a leh Dr. L Murugan-a te pawh an tel a, Cong hruaitu Gourav Gogoi, DMK hruaitu Tiruchi Shiva, TMC hruaitu Derek O Brien, Shiv Sena hruaitu Naresh Mhaske-a leh hruaitu pawimawh dangte an tel bawk a ni.

Parliament thlasik thutkhawm hi naktukah tan a ni ang a, Dec ni 19 thleng neih a ni ang.

<><><>